

**I. XEDAPEN OROKORRAK****ESTATUKO BURUZAGITZA**

**5772** *4/2021 Legea, apirilaren 12koa, zeinaz berreskuratzeko baimen ordaindu bat arautzen baita besteren kontura diharduten eta funtsezko zerbitzuak ematen ez dituzten langileentzat, COVID-19aren kontrako borrokan biztanleriaren mugikortasuna murrizteko asmoz.*

FELIPE VI.a

ESPAINIAKO ERREGEA

Honako hau ikusten eta ulertzen duten guztiei.

Jakizue: Gorte Nagusiek honako lege hau onetsi dutela eta nik berretsi egiten dudala:

HITZAURREA

I

463/2020 Errege Dekretuaren bidez (martxoaren 14koa, alarma-egoera deklaratzeko duena COVID-19ak eragindako osasun-krisialdia kudeatzeko), hainbat neurri ezarri ziren gure herrialdean pertsonen mugikortasuna eta gizarte-jarduerak eta jarduera ekonomikoak murrizteko. Neurri horiei guztiei esker, COVID-19 birusaren hedapena gelditzea lortu da.

Harrezkero, Gobernuak hainbat arau-tresna erabili izan ditu ezarritako helburuak lortzeko beharrezkotzat jo diren neurriak aplikatzeko; hona helburuak: pertsonak birusaren kutsaduratik babestea, egoera txarrean dauden pertsonen arreta ematea, funtsezko osasun-zerbitzuak eta gizarte-zerbitzuak bermatzea eta ekonomiaren eta ekoizpenaren aldetik gaixotasunaren eragina jasaten duten enpresei eta langileei laguntzea. Horren guztiaren xedea da pertsonak eta enpresek atzera ere ohi bezala jardun ahal izatea gaur egun gure herrialdeko ekoizle, arreta-arloko jardule eta zerbitzu gehienak erabat gelditu dituzten ezohiko inguruabarrak desagertzen direnean.

Neurri horiek guztiak lagungarriak izan dira COVID-19 birusaren hedapena gelditzeko; batez ere, pertsonen mugimenduak mugatzeko neurriak. Telelanari, enpresamalgutasunerako neurriak eta azken asteetan ekonomiaren eta gizartearen arloetan hartu diren gainerako neurriak esker, birusak enpresetan eta lanpostuetan daukan eragin negatiboa murriztea lortu da.

Hala ere, nahiz eta elkarrengandik urruntzeko neurriak lagungarriak izan diren epidemia kontrolatzeko, hazten jarraitu du COVID-19 birusaz kutsatutako eta gaixotasuna garatuta zainketa intentsiboko unitateetan artatu behar izan diren pertsonen kopuruak (arretak, gainera, batzuetan nahiko luze jo du, eta horrek pazienteak pilatzea ekarri), eta horrek gero eta presio handiagoa ekarri dio Osasun Sistema Nazionalari, eta, batez ere laguntza-zerbitzuei.

Horregatik, epidemiologiaren esparruko adituek emandako gomendioei jaramon eginez, ezinbestekoa izan da neurri gehiago ezartzea birusaren hedapenaren kontrola zorrozteko eta zainketa intentsiboko unitateetan paziente gehiegi ez pilatzeko, unitateok gainez egin ez dezaten.

II

Kontuan hartuta Espainian joan-etorri gehienak lan-jarduerak eta jarduera profesionalak eragiten dituztela, argi geratu da lan-arloko neurri bat ezarri behar zela aipatutako

mugimendu-murrizketa bideratzeko eta mugimendu horiek behar den beste murrizteko, lortu nahi den helburua erdiesteko.

Pertsonen mugimenduak ahalik eta gehien mugatzeko, sektore zehatz batzuetako langileenak izan ezik behar-beharrezkoak direlako, Espainiako Gobernuak errege lege-dekretu hau onetsi zuen: 10/2020 Errege Lege Dekretua, martxoaren 29koa, zeinaz berreskuratzeko baimen ordaindu bat arautzen baita besteren kontura diharduten eta funtsezko zerbitzuak ematen ez dituzten langileentzat, COVID-19aren kontrako borrokan biztanleriaren mugikortasuna murrizteko asmoz. Errege lege-dekretu hori, Diputatuen Kongresuak baliozkotu ondoren, lege-proiektu gisa izapidetu da.

### III

Lege honetan, berreskuratzeko baimen ordaindu bat arautzen da besteren konturako lan-kontratudun jakin batzuentzat; hain zuzen ere, eranskinean funtsezkotzat jotzen ez diren jardueretako batean diharduten sektore publiko zein pribatuko besteren konturako lan-kontratudunentzat. Baimena hartu beharrekoa da nahitaez, martxoaren 30etik apirilaren 9ra bitartean (biak barne).

Lege hau ez zaie aplikatuko adierazitako aldi horretan kontratua etenda daukaten langileei eta etxetik lanean jarraitu ahal dutenei.

Eskuordetutako agintaritze eskudunek, bakoitzak bere eskumeneko esparruan, artikulua honetan arautzen den baimen ordaindua eta beraren ondorioak aplikatuko diren jarduerak aldatu edo zehaztu ditzakete, aginduen bidez.

Xedapen iragankorretan salbuespen puntual eta mugatuak ezartzen dira (i) lege honetan ezartzen den baimenak kalte konponezina edo oso handia egin diezaiekeen jardueretako eta (ii) lege hau indarrean jartzen denean zerbitzua egiten ari diren garraio-jardueretako langileentzat.

Beste alde batetik, xedapen gehigarrietan arau bereziak ezartzen dira enplegatu publikoentzat eta legeria berezia duten langileentzat, Justizia Administrazioaren funtsezko zerbitzuetan ari direnentzat eta beste langile batzuentzat.

### IV

Lege hau bat dator Administrazio Publikoen Administrazio Prozedura Erkidearen urriaren 1eko 39/2015 Legeak galdegiten dituen printzipioekin: premia, eraginkortasuna, proportzionaltasuna, segurtasun juridikoa, gardentasuna eta efizientzia. Horren ildotik, beharrezkotasunaren eta eraginkortasunaren printzipioak betetzen ditu; izan ere, ezartzen diren neurrien oinarrian herritar guztien interesa dago, eta lege hau da hori lortzeko tresnarik egokiena. Horrenbestez, lege honen bidez erantzuna ematen zaio COVID-19 birusak sortu duen osasun-alertaren ondoriozko ezohiko larrialdiak jardura ekonomikoan eta enplegua atxikitze eta babesteko zereginean kontrolik gabeko ondorio konponezinak edukitzeko arriskua ahalik eta gehien jaisteko beharrari; horrela, babesgabetasuna saihestuko da eta jardura ekonomikoa berrabiatzea eta suspertzea bermatuko da.

Gainera, proportzionala ere bada: bere helburua lortzeko behar-beharrezkoak diren alderdiak baino ez ditu arautzen eta aurrez azaldutako aparteko eta presako beharrezkoak dagoen artean baino ez ditu sortuko ondorioak. Halaber, segurtasun juridikoaren printzipioa ere betetzen du, eta koherentea da gainerako ordenamendu juridikoarekin.

Gardentasun-printzipioa ere betetzen du; izan ere, argi eta garbi zehazten du zein den bere asmoa, eta azalpena ematen du. Azkenik, efizientzia-printzipioari dagokionez, lege honek ez du administrazio-karga gehigarririk ezarriko aurretik zeudenez gain.

#### 1. artikulua. *Aplikazio-eremu subjektiboa.*

1. Lege hau sektore publiko zein pribatuko enpresetan eta erakundeetan lanean ari diren besteren konturako langile batzuei aplikatuko zaie; martxoaren 14ko 463/2020 Errege

Dekretuak deklaritzen duen alarma-egoeraren ondorioz jarduera eten ez zaienei, hain zuzen ere.

2. Hala ere, honako hauei ez zaie aplikatuko:

- a) Lege honen eranskinean funtsezkotzat jotzen diren sektoreetan lanean ari direnei.
- b) Lege honen eranskinean funtsezkotzat jotzen diren sektoreetako jarduera-ataletan edo ekoizpen-lerroetan lanean ari direnei.
- c) Aldi baterako enplegu-erregulazioko espedientea eskatu duten edo aplikatzen ari diren enpresek kontratatutako langileei (i) eta lege honetan arautzen den baimena indarrean dagoen bitartean aldi baterako enplegu-erregulazioko espedientea onartzen zaien enpresek kontratatutako langileei (ii).
- d) Aldi baterako ezintasunagatik bajan dauden langileei eta kontratua legezko beste arrazoi batzuegatik etenda daukaten langileei.
- e) Telelanaren bidez edo bertaratu gabeko beste modalitate batean etxetik ohi bezala jardun dezaketen langileei.

2. artikulua. *Baimen ordaindua.*

1. Lege honen aplikazio-esparruan dauden langileek berreskuratzeko baimen ordaindua hartu beharko dute nahitaez, 2020ko martxoaren 30etik apirilaren 9ra arte (biak barne).

2. Baimen hori hartzen duten langileek ohi bezala lan eginez gero jaso beharko lituzketen ordainsariak jasoko dituzte; ordainsarrietan oinarritzko soldata eta osagarriak sartuko dira.

3. artikulua. *Baimen ordainduan lan egin gabeko orduak berreskuratzea.*

1. Lanordua alarma-egoera amaitzen den egunaren biharamunetik 2020ko abenduaren 31ra arte berreskuratu ahal izango dira.

2. Lanordua nola berreskuratu negoziatu egin beharko da; horretarako, enpresak eta langileen legezko ordezkariak gehienez ere zazpi egun edukiko dituzte kontsultak egiteko.

Langileen legezko ordezkariarik ez badago, kontsultaldiko negoziazioetan ariko den langileen ordezkari-tatzordean enpresaren sektoreko ordezkari-tatzordean parte hartzeko legitimazioa dutenak. Baldintza horiek betetzen dituen sindikatu bakoitzak ordezkari bat edukiko du batzordean. Erabakiak ordezkari-gehiengo bidez hartuko dira. Ordezkari-tatzorde hori eratzen ez bada, batzordean enpresako hiru langile ariko dira, zeinak Langileen Estatutuaren Legearen testu bategina onartzen duen urriaren 23ko 2/2015 Legegintzako Errege Dekretuak 41.4 artikuluan ezartzen duenarekin bat etorritik hautatuko baitira.

Kasu batean zein bestean, ordezkari-tatzordea nahitaez bost egun igaro baino lehen eratu behar da.

Kontsultaldian fede onez negoziatu behar dute alderdiek, akordio bat lortzeko asmoarekin. Akordioa lortzeko, langileen legezko ordezkari gehien adostasuna beharko da, edo, bestela, langileen ordezkari-tatzordeko kide gehienena. Batera zein bestera, ezinbestekoa da aparteko baimenak eragin dien langile gehienak ordezkari-tatzordea onartzen duten ordezkariak.

Alderdiek noiznahi adostu ahal izango dute Langileen Estatutuaren 83. artikuluan aipatzen diren estatu- zein autonomia-eremuko lanbide arteko akordioetan ezartzen diren arbitraje edo bitartekaritza-prozedurak erabiltzea kontsultaldiaren ordezkariak.

Egiten den akordioan, artikulua honetan arautzen den baimeneko lanordu guztiak edo batzuk berreskuratzea arautu ahal izango da, eta, horrez gainera, gutxienez zenbat denbora arinago abisatu behar zaien langileei zer egunetan eta zer ordutan egin behar duten lan, eta lan egin gabeko orduak berreskuratzeko erreferentziatzat hartuko den aldia ere bai.

Kontsultaldian akordiorik lortzen ez bada, hura amaitu ondoko zazpi egunetan enpresak langileei eta ordezkartza-batzordeari jakinaraziko die zer erabaki duen baimenaren aplikazioan lan egin gabeko orduak berreskuratzeari buruz.

3. Nolanahi ere, lan horiek berreskuratzeak ezin du eragin legean eta hitzarmen kolektiboan ezarritako eguneko eta asteko gutxieneko atsedenaldiak ez betetzea, abisua egiteko epealdia Langileen Estatutuak 34.2 artikuluan ezartzen duena baino laburragoa izatea, ez eta aplikatzen den hitzarmen kolektiboan ezartzen den urteko gehieneko lanaldia gainditzea ere. Gainera, legerian eta hitzarmenetan ezartzen diren bizitza pertsonala, lana eta familia-bizitza uztartzeko eskubideak errespetatu behar dira.

4. artikulua. *Ezinbesteko gutxieneko jarduera.*

Artikulu honetan arautzen den berreskuratzeako baimen ordaindua aplikatu behar duten enpresek ezarri ahal izango dute plantillako zenbat langile diren beharrezkoak gutxienez ezinbesteko jarduera mantentzeko, beharrezkoa izanez gero. Ezinbesteko jarduera eta jarduera hori mantentzeko gutxieneko langileen kopurua ezartzeko erreferentziak ohiko asteburu edo jaiegun batekoak izango dira.

5. artikulua. *Jarduerak egokitzea.*

Agintari eskudun eskuordetua den aldetik, Osasuneko ministroak artikulu honetan arautzen den baimen ordaindua eta beraren ondorioak aplikatuko diren jarduerak aldatu edo zehaztu ahal izango ditu aginduen bidez.

Lehenengo xedapen iragankorra. *Enpresa-jarduerari berriz ekiteko bermeak.*

Enpresaren jarduera berehala etetea ezinezkoa den kasuetan, lege honen eremu subjektiboan sartzen diren langileek lanean jarraitu ahal izango dute 2020ko martxoaren 30ean (astelehena), baimen ordaindu berreskuragarria gauzatzeko ezinbestekoak diren lanak egiteko, enpresa-jarduerari berriz ekiteari ezinbestean edo neurritz kanpo kalterik egin gabe.

Bigarren xedapen iragankorra. *Garraio-zerbitzuen jarraipena.*

Lege hau indarrean jartzen denean bertan arautzen ez den zerbitzu bat egiten ari diren garraioaren arloko langileek arribideko zerbitzu hori amaitu ondoren hartuko dute berreskuratzeako baimen ordaindua. Behar den kasuetan, zerbitzuaren barruan sartuko da itzulera-bidaia.

Lehenengo xedapen gehigarria. *Enplegatu publikoak.*

Lurralde Politikako eta Funtzio Publikoko Ministerioak eta autonomia-erkidegoetako eta toki-erakundeetako organo eskudunek behar diren jarraibideak eta ebazpenak eman ditzakete Enplegatu Publikoaren Oinarrizko Estatutuaren Legearen testu bategina onartzen duen urriaren 30eko 5/2015 Legegintzako Errege Dekretuaren aplikazio-esparruko enplegatu publikoen zerbitzuak arautzeko, funtsezkotzat jotzen diren zerbitzu publikoen funtzionamendua mantentzearen.

Bigarren xedapen gehigarria. *Berariazko legeria propioa duten langileak.*

1. Enplegatu Publikoaren Oinarrizko Estatutuaren Legearen testu bategina onartzen duen urriaren 30eko 5/2015 Legegintzako Errege Dekretuaren 4. artikuluan aipatzen diren langileei dagokienez, haien araubide juridikoa zehazteko behar diren jarraibideak eta ebazpenak emango dira, bai haien funtsezko zerbitzuei buruz, bai zerbitzu horien antolamendu zehatzari buruz.

2. Lehen apartatuan aipatzen diren jarraibideak eta ebazpenak honako hauek emango dituzte, bakoitzak bere eskumeneko esparruan: Gorte Nagusien agintaritza

eskudunek, Estatuko gainerako organo konstituzionalen agintaritzak eskudunek, Defentsa Ministerioak, Barne Ministerioak, Justizia Ministerioak, Inteligentzia Zentro Nazionalak, Espainiako Bankuak eta Gordailuak Bermatzeko Funtzak.

Hirugarren xedapen gehigarria. *Justizia Administrazioako funtsezko zerbitzuak.*

Epailleek, fiskalek, Justizia Administrazioaren letraduek eta horren zerbitzuan ari diren gainerako langileek aurrera jarraituko dute COVID-19ak eragindako osasun-krisia kudeatzeko alarma-egoera deklaratzaren duen martxoaren 14ko 463/2020 Errege Dekretuak eten ez dituen jardun prozesalekin; horrela, Justizia Ministerioak, Botere Judizialaren Kontseilu Nagusiak, Estatuko Fiskaltza Nagusiak eta arlo horretako eskumena daukaten autonomia-erkidegoek finkatutako funtsezko zerbitzuak beteko dituzte (zerbitzuak Justiziako Estatu Idazkaritzaren 2020ko martxoaren 14ko Ebazpenean zehazten dira), lege honetan xedatzen denaren arabera beharrezkoak diren egokitzapenak eginez. Gainera, lanean jarraituko dute Erregistro Zibilaren funtsezko zerbitzuak emateko beharrezkoak diren Justizia Administrazioaren langileek, Justizia Ministerioaren jarraibideekin bat etorritik.

Laugarren xedapen gehigarria. *Jardunean jarraitzea.*

Eranskinean ageri ez diren jardueretan lanean jarraitu ahal izango da, baldin eta Sektore Publikoko Kontratuen azaroaren 8ko 9/2017 Legeak 120. artikuluan arautzen duen prozeduraren bidez kontratatu badira.

Bosgarren xedapen gehigarria. *Sektore publikoko kontraturen bat adjudikatua duten enpresetako langileak.*

Lege honetan arautzen den berreskuratzeko baimen ordaindua ez zaie aplikatuko eraikinak mantentzeko eta haien segurtasuna bermatzeko eta zerbitzu publikoak behar den bezala emateko behar diren obra-, zerbitzu- eta hornidura-kontratuen adjudikazioak dauzkaten enpresetako langileei (ez eta bertaratu gabe lan egiten dutenei ere). Nolanahi ere, horrek ez du ezertan eragozten 8/2020 Errege Lege Dekretuak 34. artikuluan ezartzen duena (8/2020 Errege Lege Dekretua, martxoaren 17koa, COVID-19aren eragin ekonomiko eta sozialari aurre egiteko presako eta ezohiko neurriena).

Azken xedapen bakarra. *Indarrean jartzea.*

Lege hau *Estatuko Aldizkari Ofizialean* argitaratzen den egunean jarriko da indarrean.

Horrenbestez,

Lege hau bete eta betearaz dezatela agintzen diet espainiar guztiei, partikular zein agintariei.

Madriren, 2021eko apirilaren 12an.

FELIPE e.

Gobernuko presidentea,

PEDRO SÁNCHEZ PÉREZ-CASTEJÓN

## ERANSKINA

Lege honetan arautzen den berreskuratzeko baimen ordaindua ez zaie aplikatuko besteren konturako langile hauei:

1. 463/2020 Errege Dekretuak 10.1, 10.4, 14.4, 16., 17. eta 18. artikuluetan ezartzen duenaren arabera eta agintaritzaren eskudunak eta eskuordetutako agintaritzaren eskudunak onartzen dituzten araudiaren arabera aurrera jarraitu behar duten jarduerak egiten dituztenei (463/2020 Errege Dekretua, martxoaren 14koa, COVID-19ak eragindako osasun-krisia kudeatzeko alarma-egoera deklaratzeko duena).

2. Merkatuko hornidura-kateko jardueretan dihardutenei eta premia-ondasunak eta zerbitzuak (janariak, edariak, animalientzako elikagaiak, higiene-produktuak, botikak, osasun-produktuak eta osasuna babesteko denetariko produktuak) sortzen eta ematen diren zentroetan horiek guztiak sorburutik azken xederaino banatzeko lanetan ari direnei.

3. Janaria etxera eramaten duten ostalaritza-zerbitzuetan eta jatetxe-zerbitzuetan ari diren langileei.

4. Osasunaren arloko ondasunak, zerbitzuak, teknologia, materialak, babes-ekipoak, osasun-ekipoak eta ospitale-ekipoak ekoizteko eta banatzeko kateetan eta osasun-zerbitzuak emateko behar diren denetariko materialak ekoizteko eta banatzeko kateetan lan egiten dutenei.

5. Eranskin honetan zehazten diren funtsezko jarduerak behar bezala egiteko behar diren hornigaiak, ekipoak eta materialak sortzen dituen manufaktura-industriaren ekoizpen-jarduerak mantentzeko ezinbestekoak diren langileei.

6. Alarma-egoera deklaratu zenetik pertsonak zein salgaiak garraiatzen dituzten langileei, eta garraio horietarako behar diren baliabideak mantentzeko lanak egiten dituztenei, alarma-egoera deklaratu zenetik agintaritzaren eskudunak eta eskuordetutako agintaritzaren eskudunak onartutako araudiaren itzalpean.

7. Espetxeetan, babes zibilean, itsas salbamenduan, salbamenduan eta suteak prebenitzeko eta itzaltzeko zerbitzuetan, meatzeetako segurtasunean eta trafikoko eta bide-segurtasunean lan egiten dutenei. Gainera, segurtasun-garraioa, alarmen erantzuna, erronda-zaintza edo etenak zaintza eskaintzen duten segurtasun pribatuko enpresetan ari direnei ere ez zaie aplikatuko, eta funtsezko zerbitzuak eta herritarren hornidura bermatzeko segurtasun-zerbitzuetan lan egiten dutenei ere ez.

8. Indar armatuen materialak eta ekipoak mantentzeko ezinbesteko lanak egiten dituztenei.

9. Osasun-arloko zentro, zerbitzu eta establezimenduetan ari direnei, ez eta (i) adinekoen, adingabeen edo mendekotasuna edo desgaitasuna duten pertsonen arretan lan egiten dutenei eta COVID-19 birusarekin lotura duten enpresa, I+G+b arloko zentro eta zentro bioteknologikoetan ari direnei, (ii) horiei atxikitako animaliategietan ari direnei, (iii) horiekin lotutako instalazioetako gutxieneko zerbitzuak mantentzeko lanak egiten dituztenei eta ikerketa horietarako behar diren produktuez hornitzen duten enpresetan lan egiten dutenei eta (iv) hileta-zerbitzuetan eta horiekin lotutako beste jarduerak batzuetan ari direnei ere.

10. Animalien osasun-arretako zentroetan, zerbitzuetan eta establezimenduetan ari diren langileei.

11. Prentsa-saltokietan lan egiten dutenei eta komunikabide edo albiste-agentzia pribatu zein publikoetan lan egiten dutenei, bai eta horiek inprimatzen edo banatzen dihardutenei ere.

12. Finantza-zerbitzuak (banku-zerbitzuak, aseguru-zerbitzuak eta inbertsio-zerbitzuak barne) ematen dituzten enpresetako langileetako batzuei; ezinbestekoak diren zerbitzuak egiteko eta ordainketa-azpiegituretako eta finantza-merkatuetako berezko jarduerak egiten dituztenei, hain zuzen ere.

13. Funtsezko telekomunikazio-enpresetan, ikus-entzunezkoen enpresetan edo informatika-zerbitzuetako enpresetan ari diren langileei; horien euskarri diren sareetan eta instalazioetan ari direnei; eta sare eta instalazio horiek egoki funtzionatzeko behar diren sektoreetan edo azpisektoreetan ari direnei; batez ere, zerbitzu publikoak ondo emateko



eta enplegatu publikoek bertaratu gabe lan egin ahal izateko ezinbestekoak direnetan diharduten guztiei.

14. Genero-indarkeriaren biktimen babesarekin eta arretarekin lotutako zerbitzuak ematen dituztenei.

15. COVID-19ak eragindako osasun-krisia kudeatzeko alarma-egoera deklaritzen duen martxoaren 14ko 463/2020 Errege Dekretuak eten ez dituen jardun prozesaletan aritzen diren abokatuak, prokuradoreak, lan-harremanetako graduak, itzultzaileak, interpreteak eta psikologoak; Justizia Ministerioak, Botere Judizialaren Kontseilu Nagusiak, Estatu Fiskaltza Nagusiak eta arlo horretako eskumena daukaten autonomia-erkidegoak adostutako eta finkatutako eta Justiziako Estatu Idazkaritzaren 2020ko martxoaren 14ko Ebazpenean zehaztutako funtsezko zerbitzuak eta beharrezkoak diren eta adosten diren egokitzapenak betetzen dituztenei.

16. Legelari-bulegoetan eta lege-aholkularitzako bulegoetan, gestoria administratiboetan eta lan-harremanetako gradudunen gestoretan eta laneko arriskuen prebentzioko kanpoko zein norberaren zerbitzuetan presako gaietan lan egiten dutenei.

17. Segurtasun Juridiko eta Fede Publikoko Zuzendaritza Nagusiak finkatutako funtsezko zerbitzuak betetzeko notario-bulegoetan eta erregistroetan lan egiten dutenei.

18. Garbiketako zerbitzuetan, mantentze-lanetan, matxurak presaka konpontzen eta zaintzan ari diren langileei, hondakin arriskutsuak eta hiriko hondakin solido arriskutsuak zein arriskurik gabeak biltzen, kudeatzen eta tratatzen lan egiten dutenei, hondakin-urak biltzen eta tratatzen lan egiten dutenei, hondakinen deskontaminazioan eta hondakinak kudeatzeko beste zerbitzu batzuetan ari direnei, azpiproduktuak garraiatzen eta kentzen lan egiten dutenei eta sektore publikoko erakundeetan Sektore Publikoko Kontratuen azaroaren 8ko 9/2017 Legearen 3. artikuluari jarraituz lan egiten dutenei.

19. Errefuxiatuentzako harrera-zentroetan eta immigranteentzako aldi baterako egonaldi-zentroetan lan egiten dutenei eta Migrazioen Estatu Idazkaritzak emandako dirulaguntzekin nazioarteko babesaren eta arreta humanitarioaren arloan ari diren kudeaketa pribatuko erakunde publikoetan lan egiten dutenei.

20. Urez hornitzeko eta ura arazteko, bideratzeko, edangarri bihurtzeko eta saneatzeko zerbitzuetan lan egiten dutenei.

21. Eguraldia iragartzeko eta behatzeko zerbitzu meteorologikoak emateko eta horiekin lotutako prozesu operatiboak mantentzeko, zaintzeko eta kontrolatzeko lanak egiteko ezinbestekoak diren langileei.

22. Estatuak posta-zerbitzu unibertsala emateko izendatzen duen operadoreko langileei, hau da, zerbitzu hori bermatzeko posta biltzen, hartzen, garraiatzen, sailkatzen, banatzen eta etxera eramaten lan egiten dutenei.

23. Osasun-materiala inportatzen eta horretaz hornitzen parte hartzen duten sektoreetan edo azpisektoreetan lan egiten dutenei, hau da, logistikako enpresetan, garraio-enpresetan, biltegi-enpresetan eta aduana igarotzeko enpresetan (garraio-bitartekarietan) lanean ari direnei, eta, oro har, osasun-lerroetan ari diren guztiei.

24. Internetez, telefonoz edo postaz erosten diren produktuak banatzen eta etxera eramaten dituzten langileei.

25. Ezinbestekotzat jotzen den zerbitzuren bat egiten duten gainerako guztiei.